

09 NOV 1996

PRESIDEN PERU AKAN LAWAT MALAYSIA 20-22 NOV

KUALA LUMPUR, 9 Nov (Bernama) -- Presiden Peru Alberto Fujimori akan mengadakan lawatan rasmi tiga hari ke Malaysia mulai 20 Nov ini.

Beliau akan diiringi beberapa menteri kabinetnya dan wakil sektor swasta utama.

Semasa lawatan itu, Fujimori akan mengadap Yang di-Pertuan Agong Tuanku Ja'afar dan diraikan pada jamuan negara pada hari pertama lawatan.

Menurut kenyataan Wisma Putra di sini, lawatan itu merupakan jemputan Yang di-Pertuan Agong dan sebagai kunjungan balas lawatan rasmi Perdana Menteri Datuk Seri Dr Mahathir Mohamad ke Peru tahun lepas.

Fujimori akan dianugerahi Darjah Utama Seri Mahkota Negara (DMN) oleh Tuanku Ja'afar dan juga Ijazah Doktor Kehormat Sains oleh Universiti Pertanian Malaysia (UPM).

Presiden itu juga akan mengadakan perbincangan dengan Dr Mahathir mengenai isu berkaitan hubungan dua hala Malaysia/Peru seperti perdagangan, kerjasama pelaburan dan kemungkinan projek usahasama negara dan isu antarabangsa.

Beberapa perjanjian dijangka ditandatangani antara sektor swasta kedua-dua negara disaksikan oleh kedua-dua pemimpin itu.

Lawatan itu juga akan termasuk taklimat di Unit Perancang Ekonomi (EPU) dan melawat rancangan tanah Felda di Bahau, Negeri Sembilan.

-- BERNAMA

HAK NHD